



**Äntwert vum Här Minister fir d'Fonction publique Marc Hansen a vun der Madamm
Inneministesch Taina Bofferding op d'parlamentaresch Fro n°5257 vum 18.11.2021 vum
honorabelen Deputéierte Marc Goergen iwwert d'Primmen an der Fonction publique**

Den Avenant zum besteende Kollektivvertrag fir d'Staatsaarbechter gouf den 11. Februar 2021 ënnerschriwwen an ass de selwechten Dag a Kraaft getrueden. Den 10. Mäerz huet de Minister fir d'Fonction publique dësen Avenant der zoustänneger Chamberkommissioun am Detail presentéiert, an enger Sitzung, wou iwweregens den honorabelen Deputéierten deelgeholl huet. Deemno erlaabt sech de Minister fir d'Fonction publique op dëser Plaz den honorabelen Deputéierten och op de Rapport vun dëser Sitzung ze verweisen. An där Sitzung gouf et keng Stëmme, déi den neie Kollektivvertrag a Fro gestallt hätten. De Kollektivvertrag, deen iwwer 3 Joer leeft an dofir och sozial Rou garantéiert, huet 2 grouss Punkte festgehalen: nieft der Erhéijung vun der Bereetschaftsprimm, gouf och nach d'Afféiere vum Compte Épargne Temps (CET) fir Staatsaarbechter vum 1.1.2022 un festgehalen.

D'Bereetschaftsprimm, vun där hei riets geet, gouf och aus Ursaache vun der Equitéit am Verglach mat anere Regimer wichteg.

D'Bereetschaftsprimm gëtt zanterhier net méi als Forfait fir eng ganz Plage Horaire vun der Bereetschaft ofgerechent, mee ganz genau pro Stonn.

D'Remuneratioun vun engem Staatsaarbechter, dee Bereetschaftsdéngscht mécht, beleeft sech op:

	Daags : 7.00 - 19.00 Auer	Nuets : 19.00 - 7.00 Auer
Fir Samschdes, Sonndes a Feierdeeg	1,2394 Euro (Index 100)	1,2394 Euro (Index 100)
Fir déi aner Deeg	0,6197 Euro (Index 100)	0,6197 Euro (Index 100)



Hei 3 Fallbeispiller fir déi Primmen z'illustréieren:

- *Beispill vun engem Agent, dee während engem Mount no Feierowend nach 3 Stonne Bereetschaft huet:*
21 Deeg X 3 Stonnen = 63 Stonnen Bereetschaft insgesamt.
Fir déi 63 Stonnen, géif den Aarbechter e Montant brut vun 333,96 EUR Bereetschaftsprimm kréien.
- *Beispill vun engem Agent, dee während engem Mount d'Weekender Bereetschaft huet:*
48 Stonne X 4 Weekender = 192 Stonnen Bereetschaft insgesamt.
Fir déi 192 Stonnen, géif den Aarbechter e Montant brut vun 2035,77 EUR Bereetschaftsprimm kréien.
- *Beispill vun engem Agent, dee während zwou Wochen no der Aarbecht 12 Stonne Bereetschaft huet:*
14 Deeg X 12 Stonnen = 168 Stonne Bereetschaft, dovunner sinn 120 Stonnen ze bezuelen nom Tarif vun 0,6197 EUR (Index 100) an 48 Stonnen nom Tarif vun 1,2394 EUR (Index 100).
Fir déi insgesamt 168 Stonnen, géif den Aarbechter e Montant brut vun 1145,07 EUR Bereetschaftsprimm kréien.

Dës Fallbeispiller illustréieren, datt et zu Augmentatiounen duerch Bereetschaftsdéngschter kënnt, mee datt déi Zuelen, déi den honorabelen Deputéierten an senger Fro virbréngt largement iwwerdriwwe sinn, et sief dann eng Persoun géing dauerhaft e ganzt Joer onënnerbrach a Bereetschaft sinn, wouvu verständlecherweis net auszegoen ass.

Den honorabelen Deputéierten ass mat Sécherheet averstanen, datt de viregte Regime vun der Bereetschaftsprimm, bei deem 5.- EUR fir eng Bereetschaft vun 12 Stonnen ausbezueelt gouf, der Realitéit vun haut net méi entsprécht fir all déi verantwortungsvoll Aufgaben, wéi zum Beispill d'Streedéngschter.

An de Joren 2020 an 2021 hunn zwëschent 141 a 427 Agenten eng vun den 2 Primme krut, déi hei applicabel sinn (d.h. P921: Astreinte hors samedi, dimanche et jours fériés an P922 : Astreinte samedi, dimanche et jours fériés). Dës Mesure kascht de Staat ongeféier 4 bis 5 Milliounen Euro d'Joer.

De Regime vun de Cantonniere ass vun dëser Mesure net betraff. Si profitéiere vun anere Primmen, déi am Artikel 7 vum groussherzogleche Reglement vum 25. Oktober 1990 (*Règlement grand-ducal du 25 octobre 1990 concernant la prestation d'heures de travail supplémentaires par des fonctionnaires ainsi que leur astreinte à domicile*) festgehale sinn.



Am Artikel 7 steet, dat den Agent, dee Bereetschaftsgdénsgcht mécht, als Ausgläich dozou eng Stonn Congé pro Permanence kritt, déi e mécht an déi 12 Stonnen dauert. Wann aus déngschtleche Grënn dësen Ausgläich net méiglech ass, gesäit dësen Artikel folgend Primmen vir:

	Daags : 7.00 - 19.00 Auer	Nuets : 19.00 - 7.00 Auer
Fir Samschdes, Sonndes a Feierdeeg	1,2394 Euro (Index 100)	1,2394 Euro (Index 100)
Fir déi aner Deeg	0,6197 Euro (Index 100)	0,6197 Euro (Index 100)

Wat de Gemengesector betrëfft, esou ass ze soen, datt d'Primmen och hei een Element vun de Paie vun de Gemengsalariéen duerstellen. Dës Paie gi vum Gemengerot fixéiert. All Gemeng kann decidéieren, ob si hire Salariéen eng Bereetschaftsprimm accordéiert an där hire Montant festleeën. Déi Gemengen, déi de Staatsaarbechterkollektivvertrag applizéieren, si fräi ze decidéieren, ob si dësen adaptéieren oder net.

Wat d'Fro no de Primmen am Gemengesector fir Direkteren an Ingenieuren, déi als Fonctionnaire oder Employé agestallt sinn, ubelaangt, verweise mer op d'Äntwert zu der parlamentarescher Fro n°4947.

Well de Kollektivvertrag vun de Staatsaarbechter net automatesch op d'Salariéen am Gemengesector applicabel ass, si weder d'Gemengenautoritéiten, nach de SYVICOL un der Ausaarbechtung vun Ännerungen um Staatsaarbechterkollektivvertrag bedeelegt.

Lëtzebuerg, den 23. Dezember 2021

De Minister fir d'Fonction publique

(s.) Marc Hansen